

EVENING GOJRI NEWS BULLETIN

20JAN 2026

1700HRS

ایوننگ گوجری نیوز بولیٹن 20 جنوری 2026

یوہ آکاشوانی جموں ہے محبوب سلطانے تے نصرت چودھری تیں خبر سُنو۔

HEADLINES

- ۱۔ لیفٹیننٹ گورنر منوج سنہا نے سرینگر گا امیراکدل آلا پیدل پُل نانہ نوا سرہ تیں تیار کرن تیں بعد افتتاح کیو۔
- ۲۔ وزیر اعلیٰ عمر عبداللہ نے بجٹ توں پہلاں میٹنگ منعقد کرگے جموں کشمیر مانہہ ترقیاتی ترجیحات گو جائیزو لیو۔
- ۳۔ حفاظتی دستاں نے بارہمولہ مانہہ ویلے سر آئی۔ای۔ڈی غی پشان کرگے اک بڑا حادثہ نانہہ ٹال دتو ہے۔
- ۴۔ کھیلو انڈیا سرمائی کھیڈ گو چھوون شمارو اج تیں لداخ غا لہ مانہہ شروع ہو گیو ہے۔
- ۵۔ عالمی کشیدگی غی وجہ توں چاندی غی قیمت تقریباً 3 لکھ 20 ہزار کلو گرام توڑی پُج گیو جدکہ سونا غا 10 گرام غی قیمت 1 لکھ 48 ہزار توڑی ہوگئی ہے۔

LG PEDESTRIAN BRIDGE

لیفٹیننٹ گورنر منوج سنہا نے اج سرینگر گا امیراکدل گو پیدل چلن آلا پُل گا نواہ سرا توں تیار ہون گے بعد افتتاح کیو ہے اُن گو کہنو تھو جے اس پروجیکٹ گو مقصد شہر گا تاریخی ورثہ نانہہ جدید سہولت غے نال اک متحرک عوامی مقام بنانو ہے افتتاح توں بعد ذرائع ابلاغ گا نمائندہ سنگ گل کرتا وان جناب منوج سنہا نے کہیو جے اس منصوبہ نانہہ سرینگر سمارٹ سٹی لمٹیڈ غے تحت شروع کیو گیو تھو جس غو مقصد شہر گا روایتی ورثہ نانہہ جدید بُنیادی ٹانچہ توں جوڑ غے ثقافتی تے دلکش عوامی مقام قائم کرنو ہے اُنہاں نے کہیو جے یوہ ایک پرانوپل ہے جس نانہہ 2023 مانہہ نوا ڈیزائن سنگ بنان غو کم شروع کیو گیو تھو اُن غو مزید کہنو تھو جے اس گل غو خاس خیال رکھیو گیو ہے جے سمارٹ سٹی منصوبہ غے تحت قدیم ورثہ تے جدید سہولت بشکار رابطو قائم رے سکے۔ اُنہاں نے مزید اس طرح کہیو۔

CM PRE BUDGET MEETINGS

وزیر اعلیٰ عمر عبداللہ نے اج بکھ بکھ محکماں سنگ بجٹ توں پہلاں میٹنگ منعقد کی تانچہ ترجیح غو جائیزو ، عوامی ضرورت گو اندازو تے تجویز نانہہ ترقیاتی

ہدف سنگ جوڈیو جاسکے اس میٹنگ مانہ عوامی فلاح ور مبنی قدم بہتر خدمات گی فراہمی تے جموں کشمیر غی ترقی ور زور پایو گیو22 جنوری توڑی جاری رہن آلی ان میٹنگ مانہ اہم محکماں بشمول مالیات، بجلی، تعلیم، صحت، سیاحت، سماجی بہبود، زراعت، ٹرانسپورٹ تے صنعتاں غی بجٹ تجویز گو جائیزو لیو جے غو اس ضمن مانہ گل بات گو مقصد آن آلا مالی براں واسطے رقم غی پوری تقسیم تے مرکزی زیر انتظام علاقہ مانہ موثر منصوبہ بندی نانہ یقینی بنانوں ہے۔

IED FOUND

حفاظتی دستاں نے اج سرینگر بارہمولہ شاہراہ ور ویلے سرکاروائی کرتا مانہ دھماکہ خیز مواد آئی۔ای۔ڈی غی نشاندہی کرغے اک بڑا اسانحہ نانہ ٹال دتو ہے آئی۔ای۔ڈی غی فوج غی گشت کرن آلی ٹیم نے نشاندہی کی جس غے فوراً بعد علاقہ غی کیرا بندی کی گئی تے اس دوران احتیاطی قدم چاتا مانہ شاہراہ ور نقل و حرکت وی روک دتی گئی اس سلسلہ مانہ بہم نانہ ناکاری بنان آلا دستہ نے فوری طور ور موقع ور پُج غے اس آئی۔ای۔ڈی نانہ وی ناکار بنایو واضع رہ جے یوہ واقعہ یوم جمہوریہ غی تقریب توں ایک ہفتہ توں وی کہٹ عرصہ توں پہلاں پیش آبو ہے اونگا وادی کشمیر مانہ حفاظتی انتظام مزید سخت کردتا ہیں تے خدشو ہے جے دہشت گرد ملک مخالف کاروائی کرسکیں۔

SECURITY RAJOURI

بھارت پاکستان قبضہ لکیر سنگ جڑیا واں سرحدی ضلع راجوری مانہ یوم جمہوریہ غی تقریب توں پہلاں حفاظتی اداراں نے نگرانی سخت کردتی ہے تے حفاظتی انتظام وی مزید بدھا دتا ہیں اپنی حکمت عملی غی اہمیت غی وجہ توں یوہ ضلعو امن نانہ متاثر کرن آلا دشمن عناصر غی سازشاں توں حساس سمجھیو جے جدکہ حفاظتی دستاں گی طرفوں تمام ٹورتا قدم چاہ غے ماضی مانہ ایسی کوششاں نانہ لگاتار ناکام بنایو گیو ہے یوم جمہوریہ غی تقریب توں پہلاں ضلع گی تمام تحصیلاں مانہ حفاظتی انتظام مزید مستحکم کردتا گیا ہیں اس حوالہ سنگ مزید تفصیل مہارا ضلع گا نمائندہ توں۔

PROG ANNOUNCEMENT

علاقائی خیراں آلو شعبو آکاشوانی جموں 24 جنوری 2026 نانہ 77 واں یوم جمہوریہ گا سلسلہ مانہ 30 منٹاں گو ایک خصوصی گل بات گو پروگرام منعقد کرے غو اس خصوصی نشریات غو موضوع مہارو آئین مہاری مضبوطی رکھیو گیو ہے تے یاه نشریات بار آلے تہاڑے یعنی 24 جنوری نانہ دوپہر 12:30 منٹاں ور براہ راست سنی جاسکے جس مانہ مہارا مہمان دفاعی تجزیہ کار برگیڈیر ڈی۔این۔پانڈے تے آئین گے ماہر غا طور ور جموں یونیورسٹی گا قانون آلا شعبہ توں تعلق رکھن آلا

پروفیسر وجے سنگل وین گا جھیڑا اس موضوع ور اپنا ماہرانہ رائے رکھیں گا ، جد کہ اس پروگرام غی میزبانی مہاری میزبان شروتی کھجوریہ کریں گی۔

KHELO INDIA WINTER GAMES

کھیلو انڈیا سرمائی کھیڈ 2026 غو پہلو مرحلو اج لہ، لداخ مانہ شروع ہوو جس مانہ ہزارں غی تعداد مانہ مردتے خواتین کھیڈاریاں ، کوچز تے تکنیکی افسران حصو لے رہیا ہیں۔ اس سال غی نوی خاص گل یاہ ہے کہ اس مانہ فگر سکینٹنگ ہے، جھیڑی ایک اولمپک کھیڈ ہے، سرمائی کھیڈ غو پہلو مرحلو لداخ گا نوجوان خدمات تے کھیڈ بارے محکمہ غے زیئر اہتمام تے بھارتی کھیڈ ادارہ غی نگرانی مانہ منعقد کیو جارہو ہے۔ اس شمارا غو دوجو مرحلو جموں کشمیر غا گلمرگ مانہ وے غو۔

SILVER SURGE

چاندی غی قیمت اج تیزی سنگ بدھی، تے ایک کلو گرام غی قیمت تقریباً 3 لکھ 20 ہزار روپیہ توڑی پُچ گئی۔ اسی دوران سونا غی قیمت وی بدھ رئی ہے، 10 گرام سونا غی قیمت ہُن 1 لکھ 48 ہزار توڑی پُچ گئی ہے۔ یوہ اضافو اس واسطے ہوو کیونجے لوک اپنا پیسہ نانہ محفوظ جگہاں ور لگانو چاویں، خاص طور ور دنیا مانہ سیاسی تے اقتصادی غیر یقینی حالات غے دوران۔ چاندی نے سوموار نانہ پہلی واری 3 لکھ روپیہ فی کلو غو ہدف پار کیو تھو تے پھر 3 لکھ 10 ہزار 2 سو 75 روپیہ فی کلو ور بند ہوو۔ پچھلا دو دنان مانہ چاندی غی قیمت تقریباً 32 ہزار 1 سو 87 روپیہ یعنی 11 عشایہ 18 فی صد بدھی ہے۔ دوجا پاسے سونا غی قیمتاں مانہ وی اضافو ہو رہیو ہے۔ ملکی تے بین الاقوامی بازاراں مانہ نوا ریکارڈ قائم ہو رہیا ہیں۔ فروری واسطے ہُن 10 گرام سونا غی قیمت 1 لکھ 48 ہزار 1 سو 99 روپیہ ہو گئی ہے۔

RAJMA CHOL BRAND

محکمہ زرعی پیداوار تے کساناں غی بہبود، ٹوڈہ نے ضلع انتظامیہ غا تعاون تیں بہدرواہ سرمائی میلا 2026 مانہ راجما چول برانڈ شروع کیو۔ یوہ برانڈ بہدرواہ غا اعلیٰ معیار غا راجما غی نمائندگی کرے۔ جھیڑو ذائقہ مانہ مزیدار تے غذائیت تیں بھرپور ہے۔ اس قدم غو مقصد مقامی کساناں واسطے بہتر برانڈنگ، بازاراں توڑی رسائی تے زیادہ آمدنی غا مواقع فراہم کرنا ہے تے نال ہی ضلع غی زرعی پہچان نانہ مضبوط بنانو ہے۔

HANDLOOM RBN

قومی ہتھ کڈی ترقیاتی منصوبہ، رامین مانہ بُنکاراں واسطے مورد سکیم غے تحت قرضہ غی مدد فراہم کرن غو آغاز کیو ہے۔ یاہ ایک اہم سکیم ہے جھیڑی بُنکاراں

نانہ بینکاں تیں کم سود تقریباً 6 فی صد ور قرضو دے۔ تانجے وہ روزانہ غا کاروباری اخراجات، اوزار تے سازوسامان خرید سکیں تے اس سکیم غے تحت رعایت وی دستیاب ہے۔ مورد سکیم، پہلی ادائگی غی تاریخ تیں، زیادہ توں زیادہ ترے سال واسطے دستیاب ہے۔ اس دوران اہل بُنکار کم سود غو فائدو حاصل کرسکیں، جس تیں قرض واپس کرن مانہ آسانی وے غی۔ اس بارے مزید گل کرتا واں ہتھ کڈی تے دستکاری محکمہ رامین غا اسٹینٹ ڈائریکٹر، پردیپ شان نے اس طرح کہیو۔

WEATHER UPDATE

محکمہ موسمیات نے موسم غا حوالہ تیں ہدایت جاری کی ہے ، جس غے مطابق دو مغربی ہوائی نظام 22 تیں 28 جنوری غے بشکار جموں کشمیر نانہ متاثر کرسکے، جس غے باعث کئی علاقان مانہ بارش تے برف باری غا امکان ہیں۔ پہلو تے زیادہ طاقت ور نظام 22 تیں 24 جنوری غے دوران اثر انداز وے غو ، جدکہ دوجو نظام 26 تیں 28 جنوری غے بشکار آن غی توقع ہے۔ پیر پنجال رینج، وادی چناب تے جنوبی کشمیر غا اُچا علاقان مانہ شدید بارش تے برف باری ہوسکے۔ اس بارے مزید گل کرتا واں محکمہ موسمیات غا ڈائریکٹر مختار احمد نے اس طرح کہیو۔
